

Inatsisartut ilassutitut aningaasaliissutinut inatsisissaannut siunnersuut 2023.
Aningaasaqarnermut Akileraartarnermullu Naalakkersuisumit saqqummiunneqartoq

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq

Inatsisartunut ilaasortaq Pele Broberg, Naleraq, siulittaasup tullia

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Pipaluk Lynge, Inuit Ataqatigiit

Inatsisartunut ilaasortaq Kuno Fencker, Siumut

Inatsisartunut ilaasortaq Karl Tobiassen, Siumut

Inatsisartunut ilaasortaq Jens-Frederik Nielsen, Demokraatit

UPA 2024-mi ulloq 5. april 2024 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Inatsisartut Naalakkersuisullu pillugit Inatsisartut inatsisaanni nr. 26-mi 18. november 2010-meersumi, kingusinnerusukkut allannguutitalimmi, § 16, imm. 3-mi aalajangersarneqarpoq:

"Inatsisartut Aningaasaqarnermut Ataatsimiititaliaata aningaasartuutissatut akuersissutai ukiumoortumik ilassutitut aningaasaliissutinut inatsimmi, ukiumi aningaasanut inatsiseqarfiusumi tulliuttumi Inatsisartut ileqqusumik siullermeerlutik ataatsimiinneranni oqaluuse-rineqartussami, katersorneqassapput"

Taamaalluni aningaasat atorneqareerneranni aningaasaliissutinut inatsit pineqarpoq Inatsisartut Inatsisartullu Aningaasaqarnermut Ataatsimiititaliaaa siusinnerusukkut aalajangiinerinik kiisalu Naalakkersuisut oqaasertaliussat tunngavigalugit siusinnerusukkut aalajangiinerinik inatsisinngortitsineruvoq.

2. Siunnersuutip Inatsisartunit siullermeerneqarnera

IS-imi angusassatut missingersuutigineqartut, taamatullu aamma IST-mi angusat, 250.000 kr.-iinnarnik ajorseriaateqarnerat, taamaalillunilu aningaasartuutit 2023-mut aningaasartuutissanut qummut killiliussat iluanni aningaasartuutigineqarnerat partiit akornannit naammagisimaarneqarpoq. Ukiunut aningaasanut inatsiseqarfiusunut siusinnerusunut sanilliullugu ilassutitut aningaasaliissutitut suliassat amerlagisassaannginnerat taamatuttaaq naammagisimaarneqarpoq.

Suliassat ataasiakkaat sukumiinerusumik qulaajarneqarnissaat kissaatigineqartoq erseq-qissarneqarput, taamaattumillu inatsisissatut siunnersuut inaarutaasumik Aningaasaqarnermut Akileraartarnermullu Ataatsimiititaliamut suliarineqartussanngortinneqarluni.

3. Ataatsimiititaliap siunnersuummik suliarinninnerra

3.1. Illassutitut aningaasaliissuteqarnissamik qinnuteqaatit amerlassusiat

Illassutitut aningaasaliissuteqarnissamik qinnuteqaatit amerlassusiannut tunngatillugu ataatsimiititaliamit oqaatigineqassaaq, matuma kinguliani takussutissiami takuneqarsinnaasutut, illassutitut aningaasaliissuteqarnissamik qinnuteqaatit 2023-mi amerlagisassaannginnerat iluari-simaarneqarmat. Ataatsimiititaliamilli kissaatiginartinneqarpoq taakku ukioq 2020 sioqqullugu amerlassutsimittut ikitsigileqqissasut.

Ukioq	Suliat amerlassusiat
2017	46
2018	40
2019	34
2020	60
2021	45
2022	46
2023	45

3.2. Aningaasaqarnikkut kisitsisit pingaarcerit

Suliassat 46-ruusimasut siunnersuummut nalinginnaasumik nassuaatini allassimavoq ukiumi aningaasanut inatsisip atuuffiani 2023-mi suliat 46-t 2023-mut aningaasaliissutit tungaasigut kinguneqartut suliarineqarput. Suliat 45-t Aningaasaqarnermut Ataatsimiititaliamut suliarineqartussanngorlugit nassiunneqarput, taakkunannga suliat 44-t akuersissutigineqarlutik, suliarlu ataaseq akuersissutigineqarani. Aammattaaq suliaq ataaseq Inatsisartunit akuerineqarpoq suliarlu ataaseq Inatsisartut Suleriaasiannut Ataatsimiititaliamit akuersissutigineqarluni.

Sulianit katillugit 45-nit akuersissutigineqartunit suliat 44-t missingersuutinut sunniute-qanngillat, suliallu 6-it Inatsisartut Suleriaasiannut Ataatsimiititaliamit akuerineqartut IST-p inerneranut 250.000 kr.-nik ajorteriartitsipput. IST-p inerneranut annikitsumik ajorteriarneq 2023-mut aningaasartutissatut killigititaq, 2023-mi missingersuutinut inatsit aalajangersakkat naapertorlugit aalajangerneqartoq, malinneqarpoq. 2023-mut aningaasanut inatsit missingersuutaasutut IST-mi 16,1 mio. kr.-nik sinneqartoorfivoq. Illassutitut aningaasaliissutinut inatsisissatut siunnersuut taamaalilluni ukiumi Aningaasanut inatsiseqarfiusumut 2023-mut IST-mi 15,8 mio. kr.-nik sinneqartoorfivoq.

Matumani eqqaamasariaqarpoq angusassatut missingersuutit inaarutaasumillu naatsorsuutitigut angusat assigiinngimmata. 2021-mi inaarutaasumik naatsorsuutitigut angusat 2021-mi Nunatta Karsiata naatsorsuutaani, ukiakkut ataatsimiinnermi kingusinnerpaamik saqqummiunneqartussami, takuneqarsinnaapput.

3.3. Nalinginnaasumik oqaaseqaatit kaammattuutilu

Illassutitut aningaasaliissuteqarnissamik qinnuteqaatit nassiunneqartut aningaasat ukuita 2023-p ingerlanerani ataatsimiititaliamit ingerlaavartumik suliarineqarsimapput. Ataatsimut isigalugu suliarinninnerminut atatillugu aalajangiinerminut atatillugu oqaaseqaateqarnissani aamma/imaluunniit apeqquteqarnissani ataatsimiititaliap pissutissaqartissimavaa. Pisut ilaanni suliapi tamakkiisumik saqqummiussivigineqarnissaata tungaanut isummernissaq kinguartinneqartariaqartarpoq. Piusuni allani akuersinerminut ataatsimiititaliaq oqaaseqaammik ilangus-sisarpoq, tamatumalu kingorna suliaq malitseqartinneqartarluni. Tassunga atatillugu pissutsit erseqqissarneqartussatut ataatsimiititaliamit pisariaqartinneqarsimasut matuma kinguliani paasissutissiissutigineqarput.

Aningaasaliissuteqartoqqaartinnagu aningaasartuuteqartoqassanngilaq aamma isertitaqarto-qassanngilaq.

Missingersuutit pillugit inatsimmi § 8 naapertorlugu aningaasaliissuteqartoqqaartinnagu aningaasartuuteqartoqarsinnaanani lu isertitaqartoqarsinnaanngilaq.

Naalakkersuisut ukiumi aningaasanut inatsiseqarfiusumi 2023-mi aningaasanik siumoortumik akuersissutitaqanngitsumik atuisimanersut siullermeerinninnermi apeqquserneqartoq ataatsimiititaliamit maluginiarneqarpoq. Tassunga atatillugu ataatsimiititaliamit erseqqissarneqassaaq tamanna suliarinninnermi ataatsimiititaliamit eqqumaffigineqartarmat pisunilu arlalinni aalajangiineq pillugu allakkiami apeqquteqarfifigineqartarmat. Tassunga atatillugu ataatsimiititaliamut paasissutissiissutigineqarpoq 2023-mi suliani aningaasanik siumoortumik akuerissutitaqanngitsumik atuisoqarsimanngitsoq.

Aningaasaliissutit nutaat allanngortitalluunniit, iliuutsinut ukiumi pineqartumi aningaasartuuteqarnermut taamaallaat tunngasinnaasut, Inatsisartut sinnerlugit Aningaasaqarnermut Ataatsimiititaliamit ukiup aningaasanut inatsiseqarfiusup ingerlanerani akuerineqarsinnaapput.
2022-mi qarasaasiat saassunneqarnerisa kingunerisaanik Asiami aningaasartuutaasunik

matussusiinissamut ilassutitut aningaasaliinissamut qinnuteqaatip, ukiumi aningaasanut inatsiseqarfimmi 2020-mi aningaasartuuteqarfioresup, akuersissutigineqannginnissaa ataatsimiititaliamit ukiumi aningaasanut inatsiseqarfimmi 2023-mi aalajangiunneqarpoq (ataatsimiititaliap suliaa nr. 01.31.06/23-01020). Suliariinnerup ukiup aningaasanut inatsiseqarfiuup, 1. januaarimit 31. decembarimut ingerlasup, iluani pinissaanik aningaasaliissuteqartarnermi tunngaviup qinnuteqaammi eqquutsinnejarsimannginnera suliap akuerineqannginneranut pissutaavoq.

Siuliani allassimasut tunngavigalugit kaammattuut nr. 1 imaattoq ataatsimiititaliamit saqqummiunneqarpoq:

Ilassutitut aningaasaliissuteqarnissamik qinnuteqaatit aningaasaliissutit nutaat allangortitalluunniit ukiumi aningaasanut inatsiseqarfiusumi 1. januarimit 31. decembarimut iliuutsinut nunatta karsianut aningaasartuuteqarfiusunut taamaallaat tunngasinna-nerannik aningaasaliisarnermi tunngavimmut eqquutsitsinerunissaat Naalakkersuisunit sulissutigineqassasoq.

Aningaasanut inatsisip Inatsisartut ukiumi aningaasanut inatsiseqarfiusumi aningaasaqarnikkut ataatsimoortumik tulleriaarinerannik ersersitsisuunera.

Aningaasanut inatsisip Inatsisartut aningaasaqarnikkut isumalluutinik ukumoortumik ataatsimoortumik tulleriaarinerannut takutitsisuunera 2008-mi missingersuusiornermut malittarisassani immikkoortoq 1.3-mi aamma 4.1-imik allassimavoq. Tamatuma malitsigisaanik ukiu-moortumik tulleriaarineq kingusinnerusukkut ilassutitut aningaasaliissuteqarnissamik qinnuteqaatitigut ataasiakkaatigut pingaaruteqartumik allangortinneqassanngilaq. Kiisalu allassi-mavoq ukiup aningaasanut inatsiseqarfiusup ingerlanerani aningaasaliissutissat nutaat allanngortitalluunniit sapinngisamik ikilisinniarneqassasut.

Aningaasanut inatsisip Inatsisartut ukumoortumik ataatsimoortumik tulleriaarinerannik takutitsisuunissaanik aalajangersagaq kommunit Namminersorlutillu Oqartussat missingersuutaat naatsorsuutaallu pilligit Inatsisartut Inatsisaata nr. 26-ip, 28. november 2016-imeersup akuerineqarneratigut inatsimmik allannguinikkut peerneqarpoq.

Inatsisip kingullertut taaneqartup § 11-a malillugu aningaasanut inatsisitigut aningaasaliissutit naalakkersuisup aalajangersakkat erseqinnerusumik aalajangersarneqarsimasut malillugit atuinissaanut piginnaatisissutaapput. Tamatuma peqatigisaanik aalajangersakkami allassi-mavoq Naalakkersuisoq, aningaasaliissutinut akisussaasusoq, aningaasaliissutit atorneqarnerannut malitseqartitsinissamut pisussaaffeqartoq, taamaaliornikkut aningaasaliissutit pitsaa-nerpaamik atorneqarsinnaaqqullugit kiisalu qulakkeerneqarsinnaaqqullugu aqtsinerup naammaginartumik aaqqissuunneqarsimanissa, tassungalu ilanngullugu aningaasanik aqutsi-nerup pitsasuullunilu atorluaaffiunissa.

Kiisalu missingersuusiornermut malittarisassani allassimavoq suliassaqarfimmi Naalakkersuisup missingersuutinik malitseqartitsinerata takutippagu atuinerusoqaratarsinnaasoq anin-

gaasaliissutinik eqquutsitsinissap qulakkeerneqarnissaanut imaluunniit ilassutitut aningaa-saliissuteqarnissap qinnutigineqarnissaanut Naalakkersuisoq pisariaqartunik iliuuseqassaaq.

Suliani allassimasut tunngavigalugit kaammattuut nr. 2 imaattoq ataatsimiittitaliamit saqqummiunneqarpoq:

Ukiup aningaasanut inatsiseqarfiusup ingerlanerani aningaasaliissuteqarnissamik qinnuteqaatit nutaat allanngortitallu, ilaatigut ilassutitut aningaasaliissuteqarnissamik qinnuteqaatit aningaasarutuitinut naatsorsuutigineqarsinnaasimannngitsunut aammalu sillimma-siussanik atugassanngortitsinernut tunngasuunissaasa eqquutsinneqarneratigut, sapinngisamik ikilisinneqarnissaasa Naalakkersuisunit sulissutigineqarnerunissaa ataatsimiiti-taliamic ilanngullugu kaammattuutigineqarpoq.

Tamatuma saniatigut Naalakkersuisut ilassutitut aningaasaliissuteqarnissamik qinnute-qaataasa aningaasanut inatsisissatut siunnersuut pillugu isumaqatigiinniarernik, taamaalillunilu ukiumi aningaasanut inatsiseqarfiusumi pineqartumi aningaasanut inatsit pillugu isumaqatigiissutinik, aallaaveqartarnissaat ataatsimiittitaliamit kaammattuutigi-neqarpoq, taamaalilluni ukiumi aningaasanut inatsiseqarfiusumi aningaasaliissutit tamarmiusut Inatsisartut aningaasanut inatsimmi aningaasanik pingarnersiuillutik tulle-riiarinerannik takutitsisuullutillu taassuminnga aallaaveqaqullugit.

Sulianik saqqummiussinermut atatillugu pitsaassutsimik qulakkeerinnittarneq

Illassutitut aningaasaliissuteqarnissamik qinnuteqaatitut suliat Naalakkersuisunut aammalu Aningaasaqarnermut Ataatsimiittitaliamut suliarineqartussanngorlugit nassiunneqartut, Naalakkersuisut isummernissaannut tunngavissiap saniatigut, aningaasaliissuteqarnissamut qinnute-qaatinut qinnutigineqartunut tamanut missingersuutinut ilanngussamik oqaasertaliussamil-luunniit ilaqtinnejassapput. Naalakkersuisut isummernissaannut tunngavissiat missinger-suutinullu ilanngussat allamik ilaqtinnagit atuarneqarsinnaasariaqarput. Kiisalu missinger-suutinut ilanngussat Naalakkersuisoqarfiiat ataasiakkaat suliassaqarfianneernatik Naalakkersuisut siunnersuutaatut ilusilerneqarsimassapput.

Suliat saqqummiunneqartut, tassunga ilanngullugu minnerunngitsumik missingersuutinut ilanngussat ilaasut, kukkunillit amerliartornerat ataatsimiittitaliamit maluginiarneqarpoq. Kukkunillit amerliartornerisa nalinginnaasumik kingunerigajuttarpaa ataatsimiittitaliap Naalakkersuisullu ataatsimut isigalugu suliamut piffissamik annertunerusumik atuisariaqarnerat. Tamatuma kingunerisarpaa qinnuteqaatip nassiunneranit ataatsimiittitaliap suliamik aalajan-gienerata tungaanut piffissap sivisunerunera.

Tassunga atatillugu ataatsimiittitaliamit Naalakkersuisunut eqqaasitsissutigineqassaaq suliat saqqummiunneqartut missingersuutinullu ilanngussat pitsaasuuunissaasa pisariaqartumik qulak-keerneqarnissaat ataatsimiittitaliamiinnani Naalakkersuisuniimmatt.

Suliani allassimasut tunngavigalugit kaammattuut nr. 3 imaattoq ataatsimiittitaliamit saqqummiunneqarpoq:

Illassutitut aningaasaliissuteqarnissamik qinnuteqaatit, tassungalu ilanngullugu minnerun-

ngitsumik missingersuutinut ilangussat oqaasertaliussallu ilaasut, pitsaassusiannik qulakkeerinnittarnerup nukitorsarnerunissaata Naalakkersuisunit sulissutigineqarnissaa ataatsimiititaliamit kaammattuutigineqarpoq.

4. Siunnersuutip aningaasaqarnikkut kingunerisassai

Inatsisisatut siunnersuut una aningaasat atorneqareerneranni aningaasaliissutinut inatsisaammat siunnersuutip akuersissutigineqarnera aningaassaqarnikkut toqqaannartumik kinguneqassanngilaq. Ataatsimiititaliap tamatumunnga allanik oqaaseqaatissaqanngilaq.

5. Ataatsimiititaliap inassuteqaatai

Siunnersuut akuerineqassasoq **ataatsimiititaliap isumaqatigiittup inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Asii Chemnitz Narup
Siulittaasoq

Pele Broberg
Siulittaasup tullia

Karl Tobiassen

Pipaluk Lynge

Kuno Fencker

Peter Olsen

Jens-Frederik Nielsen